

摘藻堂四庫全書薈要

集部

欽定四庫全書薈要卷一萬四千八十三

集部

甫里集卷八

唐 陸龜蒙 撰

七言律詩

二遺 并序

二遺者何石枕材琴薦也石者何松之所化也松者何越之東陽也東陽多名山就中金華為最枝峰蔓壑秀氣磅礴者數百里不啻神仙登臨草木芬怪永

康之地亦蟬聯其間中饒古松往往化而為石盤根  
大柯文理曲折盡為好事者得而致于人間以為耳  
目之異太山羊振文得枕材趙郡李中秀得琴薦皆  
茲石也咸以遺予予以二遺之奇聊賦詩以謝

誰從毫末見參天又到蒼蒼化石年萬古清風吹作籟  
一條寒溜滴成穿聞追金帶徒勞恨靜格音各朱絲更可  
憐幸與野人俱散誕不煩良匠更雕鐫

鳩鵲

并序

客有過震澤得水鳥所謂鵙鵲者貺余黑襟青脰碧

爪丹喙

張救反鳥嘴也

色幾及項質甚高而意卑

一本作草

戚畏

人余極哀其野逸性又非以能招累者而囚錄籠檻逼迫牕戶俛啄仰飲為活大不快真天地之窮鳥也為之賦詩擬好事者和

詞賦曾誇鶚

徒角切

鴟

牛欲切

流果為名誤別滄洲雖蒙靜

置疎籠晚不似閒栖折葦秋自昔稻梁高鳥畏至今珪組野人讎防微避繳無窮事好與裁書謝白鷗

新秋月夕客有自遠相尋者作吳體二首以謝

風初寥寥月乍滿杉篁左右供餘清因君一話故山事  
憶鶴互應深溪聲雲門老僧定未起白閣道士遙相迎  
世間羽檄日夜急掉臂欲歸岩下行

驚聞遠客訪良夜扶病起坐綸巾歌清談白紵思悄悄  
玉繩銀漢光離離三吳煙霧且如此百越琛賁來何時  
林端片月落未落強慰別情言後期

閒書

病學高僧置一牀披衣纔暇即焚香閒階雨過苔花潤  
小簾風來薤葉涼南國羽書催部曲  
時黃巢圍廣州告急東山毛  
褐傲羲皇升平聞道無時節試問中林亦不妨

### 獨夜

新秋霽夜有清境窮檐病客無佳期生公把經向石說  
而我對月須人為獨行獨坐亦獨酌獨翫獨吟還獨悲  
古稱獨立與獨步若比群居終較奇

寄吳融

字子華

一夜秋聲入井桐數枝危綠怕西風  
霏霏晚砌烟華上  
浙浙疎簾雨氣通  
君整輪蹄名未了我依琴鶴病相攻  
到頭江畔從漁事織作中流萬尺筵

中秋待月

轉缺霜輪上轉遲好風偏似送佳期  
簾斜樹隔情無限  
燭暗香殘坐不辭最愛笙調聞北里  
漸看星澹失南箕  
何人為校清涼力未似初圓欲午時

重憶白菊

蜀本作兩絕

我憐貞白重寒芳前後叢生夾小堂月朶暮開無絕艷  
風莖時動有奇香何慙謝雪清才詠不羨劉梅貴主粧  
更憶幽窓凝一夢夜來村落有微霜

別墅懷歸

水國初冬和暖天南榮方好背陽眠題詩朝憶復暮憶  
見月上弦還下弦遙為晚花吟白菊近炊香稻識紅蓮  
何人授我黃金百買取蘇君負郭田

寄淮南鄭寶書記



記室千年翰墨孤  
唯君才學似應徐  
五丁驅得神功盡  
二酉搜來秘檢疎  
煬帝帆檣留澤國  
淮王牋奏入班書  
清詞醉草無因見  
但釣寒江半尺鱸

小雪後書事

時候頻過小雪天  
江南寒色未曾偏  
楓汀尚憶逢人別  
麥隴唯應欠雉眠  
更擬結茅臨水次  
偶因行藥到村前  
隣翁意緒相安慰  
多說明年是稔年

寒夜同襲美訪寂上人

月樓風殿靜沈沈披拂霜華訪道林鳥在寒枝棲影動  
人依古堞坐禪深明時尚阻青雲步半夜猶追白石吟  
自是海邊鷗伴侶不勞金偈更降心

和江南道中懷茅山廣文南陽博士三首

一片輕帆背夕陽望三峯拜七真堂

三茅二許一陽  
一郭是為七真天

寒夜漱雲牙淨雪壞晴梳石髮香自拂烟霞安筆格獨  
開封檢試砂牀莫言洞府能招隱會輾飈輪見玉皇  
壺中行坐可攜天何況林間息萬緣組綬任垂三品石

珮環從落四公泉丹臺已運陰陽火碧簡須雕次第仙

廣文王季  
猶在場中

想得雷平春色動五芝烟甲又芊綿

良常應不動移文金醴從酸亦自醺

蓬萊公洛廣休以  
金醴四升待主簿

主簿恨  
其味酸

桂父舊歌飛絳雪桐孫新韻倚玄雲春臨柳谷

鶯先覺曙蘸蕪香鶴共聞珍重雙雙玉條脫盡憑三島

寄羊君

早春雪中作吳體寄襲美

迎春避臘不肯下欺花凍草還飄然光填馬窟蓋塞外

勢壓鶴巢偏殿巔山爐癭節萬狀火墨突乾衰孤穗煙  
君披鶴氅獨立何人解道真神仙

和吳中言情見寄韻

菰煙蘆雪是儂鄉釣線隨身好坐忘徒愛右軍遺點畫  
閒披左氏得膏肓無因月殿聞移屣祇有風汀去採香  
莫問江邊漁艇子玉皇看賜羽衣裳

和揚州看辛夷花韻

柳疎梅墮少春叢天遣花神別致功高處朵稀難避日

金  
卷八  
動時枝弱易為風堪將亂蘂添雲肆若得千株便雪宮  
不待群芳應有意等閒桃杏即爭紅

和行次野梅韻

飛棹參差拂早梅強欺寒色尚低徊風憐薄媚留香與  
月會深情借艷開梁殿得非蕭帝瑞齊宮應是玉兒媒  
不知謝客離腸醒臨水剛添萬恨來

和暇日獨處見寄

謝府殷樓少暇時又拋清宴入書帷三千餘歲上下古

八十一家文字奇

司馬遷書上下紀三千餘歲  
太玄有八十一家率多奇字

冷夢漢

皋懷鹿隱靜憐烟島覺鴻離知君滿篋前朝事鳳諾龍  
奴借與窺

和襲美見訪不遇

為愁煙岸老塵囂扶病呼兒斲翠苔  
祗道府中持簡牘不知林下訪漁樵  
花盤小墖晴初壓葉擁疎籬凍未燒  
倚杖徧吟春照午一池冰段幾多消

訓襲美見寄海蟹

藥杯應阻蟹螯香却乞江邊採捕郎自是揚雄知郭索

太玄經云蟹之郭索

且非何胤敢銀蝗

何胤侈于食味稍欲去其甚者猶有鮓腊糟蟹

骨

清猶似含春靄沫白還疑帶海霜強作南朝風雅客夜來偷醉早梅傍

和開元寺客省早景即事韻

日上罌恩疊影紅一聲清楚萬緣空襪襪滿地貝多雪料峭入樓于闐風水榭初抽寥泺思竹窓猶挂夢魂中靈香散盡禪家接誰共殷源小品同

辨正論亦有九流一曰禪家者流殷

浩讀小品經下二百  
籤疑義以問支道林

獨夜有懷因作吳體寄襲美

人吟側景抱凍竹鶴夢缺月沈枯梧清澗無波鹿無魄  
白雲有根虬有鬚雲虬澗鹿真逸調刀名錐利非良圖  
不然快作燕市飲笑撫肉枰

音磬

眠酒壚

闔閭城北有賣花翁討春之士往往造焉因招襲  
美

故城邊有賣花翁水曲舟輕去盡通十畝芳菲為舊業



一家烟雨是元功  
閒添藥品年年別  
笑指生涯樹樹紅  
若要見春歸處所  
不過攜手問東風

和襲美病中海石榴花盛發見寄韻

紫府真人餉露囊  
猗蘭燈燭未熒煌  
丹華乞曙先侵日  
金焰欺寒却照霜  
誰與佳名從海曲  
祗應芳裔出河陽  
那堪謝氏庭前見  
一段清香染郗郎

襲美以春橘見惠因次韻酬謝

到春猶作九秋鮮  
應是親封白帝煙  
良玉有漿須讓味

明珠無類亦羞圓  
堪居漢苑霜梨上  
合在仙家火棗前  
珍重更過三十子  
不堪分付野人邊

王僧辯嘗為荆南  
得橘一蒂三十子

以獻梁  
元帝

和襲美病中書情寄崔諫議韻

或偃虛齋或在公  
藹然林下昔賢風  
庭前有蝶爭煙藥  
簾外無人報水筒  
行藥不離深幌底

時患  
眼疾

寄書多向遠

山中西園夜燭偏  
堪憶曾為題詩刻  
半紅

訓病中見寄

逢花逢月便相招，忽卧雲航隔野橋。  
春恨與誰同醕酎，玄言何處問逍遙。  
題詩石上空迴筆，拾蕙汀邊獨倚橈。  
早晚却還巖下電，

襲美時  
有眼疾

共尋芳徑結煙條。

和襲美病中孔雀

懶移金翠傍簷楹，斜倚芳叢舊態生。  
唯奈瘴煙籠飲啄，不堪春雨滯飛鳴。  
鴛鴦水畔迴頭羨，苴寇圖前舉眼驚。  
爭得鷓鴣來伴著，不妨還校有心情。

上元日道室焚修寄襲美

三清今日聚靈官玉刺齊抽謁廣寒執蓋冒花香寂歷

侍晨交珮響闌珊

執蓋侍晨皆  
仙之貴侶矣

將排鳳節分階易欲校

龍書下筆難唯有世塵中小兆夜來心拜七星壇

正月十五日惜春寄襲美

六分春色一分休滿眼東波盡是愁花匠礙寒應束手  
酒龍多病尚垂頭無窮懶惰齊中散有底機謀敵右侯  
見織短蓬栽小檝挈煙間弄箇漁舟

次襲美病中見寄

日華風蕙正交光  
羯末相攜藉草塘

羯謝玄小字末謝川小字

佳酒

旋傾酈醪嫩短船  
閒弄木蘭香煙絲  
鳥拂來縈帶藥槿  
人收去約簧今日  
好為聯句會不成  
剛為欠檀郎

春雨即事寄襲美

小謝輕埃日日飛

小謝詠雨詩有散漫似輕埃句

城邊江上阻春暉  
雖

愁野岸花房凍還得  
山家藥笋肥雙屐著  
頻看齒折敗裘披  
苦見毛稀比隣釣叟  
無塵事灑笠鳴蓑夜  
半歸

和襲美見寄韻

雖失春城醉上期下帷裁徧未裁詩因吟郢岸百畝蕙  
欲採商崖三秀芝棲野鶴籠寬使織施山僧飯別教炊  
但醫沈約重瞳健不怕江花不滿枝

偶掇野蔬寄襲美

野園煙裏自幽尋嫩甲香蕤引漸深行歇每依鷗鷺影  
挑頻時見鼠姑心凌風藹彩初攜籠帶露虛疎或貯襟  
欲助春盤還愛否不妨瀟灑似家林

和襲美卧疾感春見寄韻

共尋花思極飛騰病帶春寒去未能烟逕水涯多好鳥  
竹牀蒲倚但高僧須知日富為神授祗有家貧免盜憎  
除却數函圖籍外更將何事結良朋

徐方平後聞赦因寄襲美

新春旒宸御輦軒海內初傳渙汗恩秦獄已收為厲氣  
瘴江初返未招魂英才盡作龍蛇蟄時停貢舉戰地多成虎  
豹村除却數般傷痛外不知何事及王孫

襲美以魚牋見寄因謝

擣成霜粒細鱗鱗知作愁吟幸見分向日乍驚新繭色

臨風時辯白萍文

魚子曰  
白萍

好將花下承金粉堪送天邊

詠碧雲見倚小窓親褰染盡圖春色寄夫君

和襲美病後春思韻

氣和靈府漸氤氲酒有賢人藥有君  
七字篇章看月得  
百勞言語傍花聞閒尋古寺消晴日  
最憶深溪枕夜雲  
早晚共搖孤艇去  
紫屏風外碧波文

襲美以公齋小宴見招



早雲纔破漏春陽野客晨興喜又忙自與酌量煎藥水  
別教安置曬書牀依方釀酒愁遲去借樣裁巾怕索將  
唯待數般幽事了不妨還入少年場

京口

江千古渡傷離情斷山零落春潮平東風料峭客帆遠  
落葉夕陽天際明戰舸昔浮千騎去釣舟今載一翁輕  
可憐宋帝籌帷處蒼翠無煙草自生

潤州送人往長洲

秋來頻上向吳亭每上思歸意剩生廢苑池臺煙裏色  
夜村蓑笠雨中聲汀洲月下菱船疾楊柳風高酒旆輕  
君住松江多少日為嘗鱸膾與蓴羹

潤州江口送人謁池陽衛郎中

山翁曾約舊交懽須拂侯門側注冠月在石頭搖戍角  
風生江口亞帆竿閒隨野醉溪聲鬧獨伴清譚曉色殘  
待取新秋歸更好九華蒼翠入樓寒

甫里集卷八

謹案卷四第六頁後五行溪寒杖屨清與前文何  
由俸祿清韻複疑有一誤

卷五第二頁前七行擊之以驅魚刊本擊訛繫據  
全唐詩改

卷七第二頁前一行桃李傍簷楹按全唐詩柰作  
李


卷八第二頁前八行防微避繳無窮事刊本微訛  
微據全唐詩改



第七頁前五行為愁烟岸老塵囂刊本塵訛神據

全唐詩改





總校官庶吉士臣張能照

校對官編修臣楊壽楠

膳錄監生臣鄒貽詩

欽定四庫全書薈要

集部

甫里集卷九至  
十一

詳校官助教臣常循



欽定四庫全書薈要卷一萬四千八十四

集部

甫里集卷九

唐 陸龜蒙 撰

言律詩

襲美以紗巾見惠因次韻酬謝

薄如蟬翅背斜陽不稱春前贈呂

女減反

郎初覺頂寒生

遠吹預憂頭白透新霜堪窺水檻澄波影好拂花牆亞

藥香知有芙蓉留自戴

桐柏真人戴芙蓉冠也

欲裁煙霧訪黃房



聞襲美有親迎之期因以寄賀

梁鴻夫婦欲雙飛  
細雨輕寒拂雉衣  
初下雪窓應眷戀  
次乘烟幃奈光輝  
參差扇影分華月  
斷續簫聲落翠微  
見說春風偏有賀  
露花千朵照庭闈

襲美以巨魚之半見分因以訓謝

誰與春江上信魚  
可憐霜刃截來初  
鱗隳似撒騷人屋  
腹斷疑傷遠客書  
避網幾跳山影破  
逆風曾感浪花虛  
今朝最是家童喜  
免泥荒畦掇野蔬

和館娃宮懷古韻

樓楣消落濯春雨蒼翠無言空斷崖  
草碧未能忘帝女燕輕猶自識宮釵  
江山祇有愁容在劒珮應和愧色埋  
賴有伍員騷思少吳王纔免似荆懷

同襲美遊北禪院

院即顧司勳  
陸郎中舊宅

連延花蔓映風廊  
岸幘披襟到竹房  
居士祇今開梵處  
先生曾是草玄堂  
清樽林下看香印  
遠岫窓中挂鉢囊  
今日有情消未得  
欲將名理問思光

襲美以紫石硯見贈以詩迎之

霞骨堅來玉自愁  
琢成飛燕古釵頭  
澄沙脆弱聞應伏  
青鐵沈埋見亦羞  
最稱風亭批碧簡  
好將雲竇漬寒流  
君能把贈行吟客  
徧寫江南物象酬

和孫發百篇將遊天台請詩贈行

直應天授與詩情  
百詠唯消一日成  
去把彩毫揮下國  
歸參黃綬別春卿  
閒窺碧落懷煙霧  
暫向金庭隱姓名  
珍重興公徒有賦  
石梁深處是君行

和開元寺荀園寄章上人

春龍爭地養檀藥況是雙林雨後看  
進出似毫當垤塼  
孤生如恨倚欄杆  
凌虛勢欲齊金刹  
折贈光宜照玉盤  
更待錦苞零落後  
粉環高下揭煙寒

薔薇

倚牆當戶自橫陳  
致得貧家似不貧  
外布芳菲雖笑日  
中含芒刺欲傷人  
清香往往生遙吹  
狂蔓看看及四隣  
遇有客來堪玩處  
一端晴綺照煙新

和詠開元寺佛鉢

空王初受逞神功四鉢須臾現一重

至今鉢緣有四重也

持次想

添香積飯覆時應帶步羅鍾光寒好照金毛鹿響靜堪  
降白耳龍從此寶函香裏見不煩西去詣靈峰

訓襲美夏首病愈見招韻

雨多青合是垣衣一幅蠻牋夜欸扉蕙帶又聞寬沈約  
茅齋猶自憶王微方靈祗在君臣正篆古須拋點畫肥  
除却伴談秋水外野鷗何處更忘機

新夏東郊閒泛有懷襲美

遲于春日好于秋野客相攜上釣舟  
經略約時冠暫亞  
佩苓箬後帶頻撈兼葭鷺起波搖笠村落蠶眠樹挂鉤  
料得祗君能愛此不爭烟水似封侯

四月十五日道室書事寄襲美

烏飯新炊甌臠香道家齋日以為常  
月苗杯舉存三洞  
雲藥函開叩九章  
一掬陽泉堪作雨  
數銖秋石欲成霜  
可中值著雷平信為覓閒眠苦竹牀

看壓新醕寄懷襲美

曉壓糟牀漸有聲  
旋如荒澗野泉清  
身前古態燠應出  
世上愁痕滴合平  
飲啄斷年同鶴儉  
風波終日看人爭  
樽中若使常能綠  
兩綬通侯摠強名

和登初陽樓寄懷北平郎中

遠窓浮檻亦成年  
幾伴楊公白晝筵  
日暖煙花曾撲地  
氣和星象却歸天  
閒將水石侵軍壘  
醉引笙歌上釣船  
無限恩波猶在目  
東風吹起細漪連

和夏初襲美見訪題小齋韻

四隣多是老農家  
百樹維桑半頃麻  
盡趁清明修網架  
每和煙雨掉縲車  
啼鶯偶坐身藏葉  
餉婦歸來鬢帶花  
不是對君吟復醉  
更將何事送年華

和襲美所居首夏適然有作韻

柿陰成列藥花空  
却憶桐江下釣筒  
亦以魚鰕供熟鷺  
近緣櫻筍識隣翁  
閒分酒劑多還少  
自記書籤白間紅  
更愛夜來風月好  
轉思玄度對支公



和題達上人藥圃二首

藥味多從遠客賫，旋添花圃漸成畦。  
三桮舊種根應異，九節初移葉尚低。  
山英便和幽澗石，水芝須帶本池泥。  
從今直到清秋日，又有香苗幾番齊。

淨名無語是清羸，藥草搜來喻更微。  
一雨一風皆遂性，花開花落盡忘機。  
教疎兔縷金絃亂，兔縷別名自擁龍芻紫。

永肥莫怪獨親幽，圃坐病容銷盡欲依歸。

和懷華陽潤卿博士三首

幾降真官授隱書  
洛公曾到夢中無  
眉間入靜三辰影  
肘後通靈五嶽圖  
北洞樹形如曲蓋  
東凹山色似重爐  
金墟福地能容否  
願作岡前蔣負芻

火景應難到洞宮  
蕭閒堂冷任天風  
談玄麈尾拋雲底  
服散龍胎在酒中  
有路還將赤城接  
無泉不共紫河通  
奇編早晚教傳授  
免以神仙問葛洪

終日焚香禮洞雲  
更思琪樹轉勞神  
曾尋下泊

宮名

常經

月不到中峯  
又累春仙道  
最高黃玉籙  
暑天偏稱白綸

巾清齋若見茅司命乞取朱兒十二斤

朱兒事見  
登真隱訣

以竹夾膝寄贈襲美

截得篋簾冷似龍翠光橫在暑天中堪臨薤簟閒憑月  
好向松窓卧跂風持贈敢齊青玉案醉吟偏稱碧荷筒  
添君野具教多著為著西齋譜一通

和夏景無事因懷章來二上人韻二首

簷外青陽有二梅折來堪下凍醪杯

離騷注云盛夏  
以醇酒置冰上

高

杉自欲生龍腦小弁誰能寄鹿胎麗事肯教饒沈謝談

微何必減宗雷還聞擬結東林社爭奈淵明醉不來

忽憶高僧坐夏堂厭泉聲鬧笑雲忙山重海澹懷中印

月冷風微宿上方病後書求嵩少藥定迴衣染貝多香

何時更問逍遙義

道林有道  
遙遊別義

五粒松陰半石牀

桐江得一釣車以襲美樂烟波之思因出以為玩

俄辱三篇復抒酬答

旋屈金鉤劈翠筠手中盤作釣魚輪忘情不效孤醒客  
有意間窺百丈鱗雨似輕埃時一起雲如高蓋強相親

任他華轂低頭笑此地終無覆敗人

曾招漁侶下清潯獨繭初隨一錘深細輾烟華無轍跡  
靜含風力有車音相呼野飯依芳草迭和山歌逗遠林  
得失任渠但<sup>平</sup>取樂不曾生箇是非心

病來懸著脆緡絲獨喜高情為我持數幅尚凝烟雨態  
三篇能賦蕙蘭詞雲深石淨閒眠穩月上江平放溜遲  
第一莫教諳此境倚天功業待君為

和吳中書事寄漢南裴尚書

風清地古帶前朝遺事紛紛未寂寥三泖涼波魚鮑動

遠祖士衡對晉武帝以三泖冬溫夏涼

五茸春草雉媒嬌

五茸吳王獵所茸各有名

雲

藏野寺分金刹月在江樓倚玉簫不用懷歸忘此景吳王看即奉弓招

和夏景冲澹偶作二首韻

蟬雀參差在扇紗竹襟輕利籜冠斜壚中有酒文園會  
琴上無絃靖節家芝畹煙霞全覆穗橘洲風浪半浮花  
閒思兩地忘名者不信人間髮解華

祗于池曲象山幽便是瀟湘浸石樓斜拂芡盤輕鷺下  
細穿菱線小鯢遊閒開茗焙嘗須徧醉撥書帷卧始休  
莫道仙家無好爵方諸還拜碧琳侯

和送李明府之任南海

春盡之官直到秋嶺雲深處凭瀧樓居人愛近沈珠浦  
候吏多來拾翠洲賓稅盡應輸紫貝蠻童多學佩金鉤  
知君不戀南枝久拋却經冬白罽裘

和寄題羅浮軒轅先生所居

鼎成仙馭入崆峒百世猶傳至道風  
暫應青詞為穴鳳却思丹微伴冥鴻  
金公的的生爐際瓊刃時時到夢中  
預恐浮山歸有日載將雲室十洲東

和寄瓊州楊舍人

明時非罪謫何偏鵬鳥巢南更數千  
酒滿椰盃消毒霧風隨蕉扇下瀧船  
人多藥戶行狂蠱更有珠官出俸錢  
祇以直誠天自信不勞詩句詠貪泉

和宿報恩寺水閣



峯抱池光曲岸平月臨虛檻夜何清僧穿小檜纔分影  
魚擲高荷漸有聲因憶故山吟易苦各橫秋簟夢難成  
周顒不用裁書勸自得涼天證道情

和醉中偶作見寄韻

海鶴飄飄韻莫儕在公猶與俗情乖初呈酒務求專判  
合禱山祠請自差永夜譚玄侵罔象一生交態忘形骸  
憐君醉墨風流甚幾度題詩小謝齋

和寄滑州李副使員外

洛生閒詠正抽毫忽傍旌旗著戰袍檄下連營皆破膽  
劍離孤匣欲吹毛清秋月色臨軍壘半夜淮聲入賊壕  
除却征南為上將平徐功業更誰高

和吳中言懷寄南海二同年

曾見淩風上赤霄盡將華藻赴嘉招城連虎踞山圖麗  
路入龍編海舶遙江客漁歌衝白苧野禽人語映紅蕉  
庭中必有君遷樹莫向空臺望漢朝

交州記云有君遷樹有朝臺尉佗望

漢所  
築

和傷史拱山人

曾說山西欲去尋，豈知霜骨葬寒林。常依淨住師冥目，

兼事容成學算心。

史學浮圖  
兼善算術

逋客預齋還梵唱，老猿窺

祭亦悲吟。唯君獨在江雲外，誰誅孤貞置峴岑。

白鷗

并序

樂安任君嘗為涇尉，居吳城中，地纔數畝而不佩俗物。有池，池中有島嶼，池之南西北邊合三亭，脩篁嘉木掩隱隈奧，處其一不見其二也。君好奇樂異，喜文。

學名理之士所得皆清散凝瑩襲美知而偕詣既坐  
有白鷗翩然馴于砌下因請浮而翫之主人曰池中  
之族老矣每以豪健據有鷗之始浮輒逐而害之今  
畏不敢入吁昔人之心蓄機事猶或舞而不下況害  
之哉且羽族麗于水者多矣獨鷗為閒暇其致不高  
耶一旦水有鯨鯢之患陸有狐狸之憂儔侶不得命  
嘯塵埃不得澡刷雖蒙人之流賞亦天地之窮鳥也  
感而為詩邀襲美同作

慣向溪頭漾淺沙  
薄煙微雨是生涯  
時時失伴沈山影  
往往爭飛雜浪花  
晚樹清涼還鷓鴣  
舊巢零落寄蒹葭  
池塘信美應難戀  
針在魚脣劍在鰕

懷楊台文楊鼎文二秀才

秋早相逢待得春  
崇蘭清露小山雲

崇蘭小山  
郡中二堂

寒花獨

自愁中見曙角多同醒  
後聞釣具每隨輕舸去  
詩題閒  
上小樓分重思  
醉墨縱橫甚書破  
羊欣白練裙

和襲美謝友人惠人參

五葉初成椴樹陰紫團峯外即鷄林名參鬼蓋須難見  
材似人形不可尋品第已聞升碧簡攜持應合重黃金  
殷勤潤取相如肺封禪書成動帝心

嚴子重以詩遊于名勝間不幸且沒襲美作詩序  
而弔之余和

每值江南日落春十年詩酒愛逢君芙蓉湖上吟船倚  
翡翠巖前醉馬分祗有汀洲連舊業豈無章疏動遺文  
猶憐未卜佳城處更斲要離冢畔雲

算山

水繞蒼山固護來當時盤踞實雄才周郎計策清宵定  
曹氏樓船白晝灰五十八年爭虎視三千餘騎騁龍媒  
何如今日家天下閭闔門臨萬國開

寄茅山何威儀二首

大小三峰次九華靈蹤今盡屬何家漢時仙上雲巔鶴  
蜀地春開洞底花閒傍積嵐尋瀑眼便凌殘雪探芝芽  
年來已奉黃庭教夕鍊腥魂曉吸霞

曾向人間拜節旄  
乍疑因夢到仙曹  
身輕曳羽霞襟狹  
髻聳栽煙鹿幘高  
山暖不葷峯上薤  
水寒仍落洞中桃  
從聞此日搜奇話  
轉覺魂飛夜夜勞



甫里集卷九

欽定四庫全書薈要卷一萬四千八十五

集部

甫里集卷十

唐 陸龜蒙 撰

七言律詩

早秋吳體寄襲美

荒庭古樹只獨倚  
敗蟬殘蛩苦相仍  
雖然詩膽大如斗  
爭奈愁腸牽似繩  
短燭初添蕙幌影  
微風漸折蕉衣稜  
安得彎弓似明月  
快箭拂下西飛鵬

病中秋懷寄襲美

病容愁思苦相兼，清鏡無形未我嫌。  
貪廣異蔬行徑窄，故求偏藥出錢添。  
同人散後休賒酒，雙燕辭來始下簾。  
更有是非齊未得，重憑詹尹拂龜占。

秋賦有期因寄襲美

時將主試貢士

雲似無心水似閒，忽思名在貢書間。  
煙霞鹿弁聊懸著，隣里漁舸暫解還。  
文草病來猶滿篋，藥苗衰後即離山。  
廣寒宮樹枝多少，風送高低便可攀。

和新秋即事三首韻

心似孤雲任所之，世塵中更有誰知愁。尋冷落驚雙鬢，  
病得清涼減四支。懷舊藥溪終獨往，宿枯杉寺已頻期。  
兼須為月求高處，即是霜輪殺滿時。

帆檝衣裳盡釣徒，往來蹤跡遍三吳。閒中展卷興亡小，  
醉後題詩點畫麤。松島伴譚多道氣，竹窓孤夢豈良圖。  
還須待致昇平了，即往扁舟放五湖。

聲利從來解破除，秋灘唯憶下桐廬。鷗鷺陣合殘陽少，

蜻蛚吟高冷雨疎辯伏南華論指指才非玄晏借書書  
當時任使真堪笑波上三年學炙魚

和南陽潤卿將歸雷平

朝市山林隱一般却歸那減卧雲懽墮階紅葉誰收得  
半盞清醪客酌乾玉笈詩成吟處曉金沙泉落夢中寒  
真仙若降如相問曾步星罡遶醮壇

顧道士亡弟子奉束帛乞銘于襲美因戲贈

童初真府召為郎君與抽毫刻便房亦謂神仙同許郭

不妨才力似班揚  
比于黃絹詞尤妙  
酬以霜縑價未當  
唯我有文無賣處  
筆鋒銷盡墨池荒

和訪寂上人不過

芭蕉霜後石欄荒  
林下無人閉竹房  
經抄未成拋素几  
錫鑲應撼過寒塘  
蒲團為拂浮埃散  
茶器空懷碧餠香  
早晚却還宗炳社  
夜深風雪對禪牀

秋夕文宴

筆陣初臨夜正清  
擊銅遙認小金鉦  
飛觥壯若遊燕市

覓句難于下趙城隔嶺故人因會憶傍簷棲鳥帶吟驚  
梁王座上多詞客五韻甘心第七成

梁昭明嘗文宴賦詩各五韻劉孝威

第七  
方成

代廣文訓襲美見贈韻

不知天隱在何鄉且欲煙霞跡暫雙鶴廟未能齊月馭  
鹿門聊擬並雲牕蘚銜荒磴移桑屐花浸春醪挹石缸  
莫惜查頭容釣伴也應東印有餘江

和寄毗陵魏處士朴

經苑初成墨沼開  
何人林下肯尋來  
若非宗測圖山後  
即是韓康賣藥迴  
溪籟自吟朱鷺曲  
沙雲還作白鷗媒  
唯應地主公田熟  
時送君家麴蘖材

和初冬偶作寄南陽潤卿韻

逐日生涯敢計冬  
可嗟寒事落然空  
窓憐返照綠書小  
庭喜新霜為橘紅  
衰柳尚能和月動  
敗蘭猶擬倩煙籠  
不知海上今清淺  
試與飛書問洛公

和冬曉章上人院



山寒偏是曉來多  
況值禪牕雪氣和  
病客功夫經未演  
故人書信納新磨  
閒靜案修茶品獨  
傍深溪記藥科  
從此逍遙知有地  
更乘清月伴君過

和題周尊師所居

見說身輕鶴不如  
石房無侶共雲居  
清晨自削靈香杪  
獨夜空吟碧落書  
十洞飛精應徧吸  
一簪秋髮未曾梳  
知君便入懸珠會  
早晚東騎白鯉魚

寒夜文宴

得驚字

各將寒調觸詩情旋見微漸入硯生霜月滿庭人暫起  
汀洲半夜鴈初驚三清每為仙題想一日多因累句傾  
千里建康衰草外舍毫誰是憶昭明

送潤卿還華陽

何事輕舟近臘回茅家兄弟欲歸來

茅司命以三月十八日十二月二日

會于華陽天

封題玉洞虛無奏點檢霜壇沆瀣杯雲肆先生

分氣調山圖公子愛詞才殷勤為向東卿薦灑掃含真  
雪後臺

和新羅弘惠上人請襲美為靈鷲山周禪師碑將  
還以詩送之

一函迢遞過東瀛  
祇為先生處乞銘  
已得雄詞封靜檢  
却懷孤影在禪庭  
春過異國人應寫  
夜讀滄洲怪亦聽  
遙想勒成新塔下  
盡望空碧禮文星

和寒日書齋即事三首每篇各用一韻

不必探幽上鬱岡  
公齋吟嘯亦何妨  
唯求薏苡供僧食  
別著毳衲待客牀  
春近帶煙分短蕙  
曉來衝雪撼疎篁

餘杭山酒猶封在遙囑高人未肯嘗

已上星津八月槎文通猶自學丹砂

江文通有丹砂可學賦

仙經

寫得空三洞隱士招來別九華靜對真圖呼綠齒偶開  
丹室問黃牙方諸更是憐才子錫賚于君合有差

名價皆酬百萬餘尚憐方丈講玄虛西都賓問曾成賦

東海人求近著書

襲美嘗作弔江都賦又新羅僧請為大師碑銘

茅洞煙霞侵

寤寐檀溪風月挂樵漁清朝還要廷臣在兩地寧容便

結廬

和臘後送內大德從勗遊天台

應緣南國盡南宗欲訪靈溪路暗通

溪在天台山下

歸思不離

雙闕下去程猶在四明東銅鉸淨貯桃花雨金策閒搖

麥穗風

上人指期國清過夏

若戀吾君先拜疏為論台嶽未封公

和寄題玉霄峰葉涵象尊師所居

天台一萬八千丈師在浮雲端掩扉永夜祗知星斗大  
深秋猶見海山微風前幾降青毛節雪後應披白羽衣  
南望煙霞空再拜欲將飛魄問靈威

南陽廣文博士還雷平後寄

微微春色染林塘  
親撥煙霞坐澗房  
陰洞雪膠知未入  
濁醪風破的偷嘗  
芝臺曉用金鐺煮  
星度閒將玉鈴量  
幾遍侍晨官欲降  
曙壇先起獨焚香

和題支山南峰僧韻

眉毫霜細欲垂肩  
自說初棲海嶽年  
萬壑烟霞秋後到  
一林風雨夜深禪  
時翻貝葉添新藏  
閒插松枝護小泉  
好是清冬無外事  
匡牀齋罷向陽眠

送董少卿遊茅山

威輦高懸度世名，至今仙裔作公卿。  
將隨羽節朝珠闕，

曾佩魚符管赤城。

董嘗判  
台州

雲凍尚含孤石色，雪乾猶墮

古松聲。應知四扇靈方在，待取歸時綠髮生。

和寄懷南陽潤卿

高抱相逢各絕塵，水經山疏不離身。  
才情未擬湯從事，玄解猶嫌竺道人。  
霞染洞泉渾變紫，雪披江樹半和春。  
誰憐故國無生計，唯種南塘二畝芹。

襲美將以綠罽為贈因成四韻

三逕風霜利苦刀  
襜褕吹斷骨蓬蒿  
病中祇自悲龍具  
世上何人識羽袍  
狐貉近懷珠履貴  
薜蘿遙羨白巾高  
陳王輕暖如相遺  
免致衰荷效廣騷

和過張祜處士丹陽故居

并序

張祜字承吉元和中作宮體小詩辭曲艷發當時輕  
薄之流能其才合譟得譽及老大稍窺建安風格誦  
樂府錄知作者本意短章大篇往往間出諫諷怨譎



時與六義相左右善題目佳境言不可刊置別處此  
為才子之最也由是賢俊之士及高位重名者多與  
之遊謂有鵠鷺之野孔翠之鮮竹柏之貞琴磬之韻  
或薦之于天子書奏不下亦受辟諸侯府性狷介不  
容物輒自劾去以曲阿地古澹有南朝之遺風遂築  
室種樹而家焉性嗜水石常悉力致之從知南海間  
罷職載羅浮石筍還不蓄善田利產為身後計死未  
二十年而故姬遺脣凍餒不暇前所謂鵠鷺孔翠竹

柏琴磬之家雖朱輪尚乘遺編尚吟未嘗一省其孤  
而恤其窮也噫人假之為玩好不根于道義耶懼其  
怨刺于神明耶天果不愛才沒而猶譴耶吾一不知  
之友人顏弘至江南道中訪其廬作詩弔而序之屬  
余應和余汨沒者不足哀承吉之道邀襲美同作庶  
乎承吉之孤倚其傳而有憐者

勝華通子共悲辛荒逕今為舊宅隣一代交遊非不貴  
五湖風月合教貧魂應絕地為才鬼名與遺編在史臣

聞道平生偏愛石至今猶泣洞庭人

和襲美寄廣文

忽辭明主事真君直取姜巴路入雲龍篆拜時輕誥命  
霓襟披後小玄纁峰前北帝三元會石上東卿九錫文  
應笑世間名利火等閒靈府剩先焚

和襲美先輩悼鶴

一夜圓吭絕不鳴八公虛道得千齡方添上客雲眠思  
忽伴中仙劍解形但掩叢毛穿古堞永留寒影在空屏

君才幸自清如水更向芝田為刻銘

幽居有白菊一叢因而成詠呈知己

還是延年一種材

菊之別名

即將瑤朶冒霜開不如紅艷臨

歌扇欲伴黃英入酒杯陶令接羅堪岸著梁王高屋好

歌來

梁朝有白紗高屋帽

月中若有閒田地為勸嫦娥作意裁

和傷開元觀顧道士

何事神超入杳冥不騎孤鶴上三清多應白簡迎將去  
即是朱陵鍊更生藥萸肯同椒醕味雲謠空替薤歌聲

武皇徒有飄飄思誰問山中宰相名

和醉中即席贈潤卿博士韻

共是虛皇簡上仙清詞如羽欲飄然登山凡著幾緗屐  
破浪欲乘千里船遠夢只留丹井畔閒吟多在酒旗前  
誰知海上無名者只記漁歌不記年

送浙東德師侍御罷府西歸

王謝遺蹤玉籍仙三年閒上鄂君船詩懷白閣僧吟苦  
俸買青田鶴價偏行次野楓臨遠水醉中衰菊卧涼煙

芙蓉散盡西歸去，唯有山陰九萬牋。

送羊振文先輩往桂陽歸覲

風雅先生去一麾，過庭才子趣歸期。

時使君丈人自毛詩博士出牧

讓

王門外開帆葉義，帝城中望戟支郢路。漸寒飄雪遠湘波，初暖漲雲遲靈均精魄。如能問，又得千年賈傅詞。

襲美留振文宴龜蒙不赴次韻酬謝

綺席風開照露晴，祗將茶薺代雲觥。繁絃似玉紛紛碎，佳妓如鴻一一驚。毫健幾多飛藻客，羽寒寥落映花鶯。

幽人獨自西牕晚閒凭香檯反照明

和重送圓載上人歸日本國

老思東極舊巖扉却待秋風泛舶歸曉梵陽烏當石磬  
夜禪陰火照田衣見翻經論多盈篋親植杉松大幾圍  
遙想到時思魏闕只應遙拜望斜暉

和褚家林亭

一陣西風起浪花遶欄杆下散瑤華高窓曲檻仙侯府  
卧葦荒芹白鳥家孤島待寒凝片月遠山終日送餘霞

若知方外還如此不要秋乘上海槎

歸鴈

北走南征象我曹天涯迢遞翼應勞似悲邊雪音猶苦  
初背岳雲行未高月島聚栖防暗繳風灘斜起避驚濤  
時人不問隨陽意空拾欄邊翡翠毛

王先輩草堂

松徑隈雲到靜堂杏花臨澗水流香身從亂後全家隱  
日校人間一倍長金綠疑作錄漸加新品秩玉皇偏賜羽



衣裳何如聖代彈冠出方朔曾為漢侍郎

句曲山朝真詞二首

歲三月十八日句曲山道士朝真于大茅峰上學神  
仙有至自千萬里者余距華陽天程止信宿塵約不  
能遂去馳神旦旦忽若戴昇矣因作朝真詞迎送各  
二解以自塞意

九華磬答寒泉急十絕幡搖翠微濕司命旂旌未下來  
焚香抱簡凝神立殘星下照霓襟冷缺月纔分鶴輪影

空洞靈章發一聲春來萬壑烟花醒

右迎真

紫雲鳳髻飄然解玉鉞玄干儼先邁朝真弟子悄無言  
再拜碧杯添沆瀣火鈴跳躍龍毛蓋腦髮青青赧綷綷  
萬象銷沈一瞬間空餘月外聞殘珮

右送真

傷越

越谿自古好風煙盜東兵纏已半年訪戴客愁隨水遠  
浣紗人泣共埃捐臨焦賴灑王師雨欲墮重登刺史天  
早晚山川盡如故清吟閒上鄂君船



甫里集卷十

欽定四庫全書薈要卷一萬四千八十六

集部

甫里集卷十一

唐 陸龜蒙 撰

七言絕句

自遣詩三十首

并序

自遣詩者震澤別業之所作也故疾未平厭厭卧田  
舍中農夫日以來耜事相聒每至夜分不睡則百端  
興懷攪人思慮益紛亂無緒且詩者持也謂持其情性

使不暴去因作四句詩累至三十絕絕各有意既曰  
自遣亦何必題為

五年重別舊山村樹有交柯犢有孫更感卞峰顏色好  
曉雲纔散便當門

雪下孤村浙浙鳴病魂無睡酒來清心搖祇待東牕曉  
長愧寒雞第一聲

多情多感自難忘祇有風流共古長座上不遺金帶枕  
陳王詞賦為誰傷

甫里先生未白頭，酒旗猶可戰高樓。  
長鯨好鱸無因得，乞取餘艍作釣舟。

花瀨濛濛紫氣昏

紫花瀨在顧渚步

水邊山曲更深村，終須揀

取幽栖處，老檣成雙，便作門。

陰洞曾為採藥行，冷雲凝絕燭微明。  
玉芝敲折琤然墮，合有真人上姓名。

長歎人間髮易華，暗將心事許煙霞。  
病來前約分明在，藥鼎書囊便是家。

醞得秋泉似玉容  
比于雲液更應濃  
思量北海徐劉輩  
枉向人間號酒龍

羊侃

口早口  
汗二切

多應自古豪  
解盤金稍置纖腰  
縱然此事

教雙得不博  
溪田二頃苗

偶然攜稚看微波  
臨水春寒一倍多  
便使筆精如逸少  
懶能書字換羣鵝

昔聞莊叟迢迢夢  
又道韓生冉冉飛  
知有姓名聊寄問  
更無言語抱斜暉

雪侵春事太無端，舞急微還近臘寒。應是也疑真宰怪，  
休時猶未徧林巒。

數尺遊絲墮碧空，年年長是惹東風。爭知天上無人住，  
亦有春愁鶴髮翁。

誰使寒鴉意緒嬌，雲晴山晚動情慆。亂和殘照紛紛舞，  
應索陽烏次第饒。

古往天高事渺茫，爭知靈媛不淒涼。月娥如有相思淚，  
祇待方諸寄兩行。



本來雲外寄閒身  
遂與溪雲作主人  
一夜逆風愁四散  
曉來零落傍衣巾

淵明不待公田熟  
乘興先秋解印歸  
我為餘糧春未去  
到頭誰是復誰非

雲擁根株抱石危  
斲來文似瘦蛟螭  
幽人帶病慵朝起  
祇向春山盡日欹

月澹花閒夜已深  
宋家微詠若遺音  
重思萬古無人賞

露濕清香獨滿襟

宋玉有  
微詠賦

南岸春田手自農  
往來橫截半江風  
有時不耐輕橈興  
暫欲蓬山訪洛公

賢達垂竿小隱中  
我來真作捕魚翁  
前溪一夜春流急  
已學嚴灘下釣筒

水國君王又姓蕭  
風情由是冠南朝  
靈和殿下巴江柳  
十二旒前舞翠條

強梳蓬鬢整斜冠  
片燭光微夜思闌  
天意最饒惆悵事  
單栖分付與春寒

無多藥圃近南榮  
合有新苗次第生  
稚子不知名品上  
恐隨春草鬪輸贏

一派溪隨箸下流  
春來無處不汀洲  
漪瀾未碧蒲猶短  
不見鴛鴦正自由

山下花明水上曛  
一橈青翰破霞文  
越人但愛風流客  
繡被何須屬鄂君

妍華須是占時生  
準擬差肩不近情  
佳麗幾時腰不細  
荆王辛苦致宮名

姼女精神似月孤敢將容易入洪爐人間縱道鉛華少  
蝶翅新篁未肯無

貞白求丹變姓名主恩潛助亦無成侯家竟換梁天子  
王整徒勞作外兵

春雨能膏草木肥就中林野碧含滋唯餘病客相逢背  
一夜寒聲減四肢

別墅懷歸

東去滄溟百里餘沿江潮信到吾廬就中家在蓬山下

一日堪憑兩寄書

野井

朱閣前頭露井多碧梧桐

一本作桃花

下美人過寒泉未必

能如此奈有銀鉸素縷何

南征

丞相南征定有無幕中誰是騁良圖  
遙知賊膽縱橫破繞帳生犀一萬株

北渡

江客柴門枕浪花，鳴機寒舫任嘔啞。  
輕舟過去真堪畫，驚起鸕鷀一陣斜。

夜泊詠棲鴻

可憐霜月暫相依，莫向衡陽趁逐飛。  
同是江南寒夜客，羽毛單薄稻粱微。

早行

水寒孤棹觸天文，直似乘槎去問津。  
縱使碧虛無限好，客星名字也愁人。

木蘭堂

洞庭波浪渺無津  
日日征帆送遠人  
幾度木蘭舟上望  
不知元是此花身

和襲美春夕陪崔諫議櫻桃園宴

佳人芳樹雜春蹊  
花外煙濛月漸低  
幾度艷歌清欲轉  
流鸚驚起不成棲

和松江早春

柳下江陰待好風  
暫時還得狎漁翁  
一生無事煙波足

唯有沙邊水勃公

和女墳湖

即吳王墓女之所

水平波淡遶迴塘  
鶴殉人沉萬古傷  
應是離魂雙不得  
至今沙上少鴛鴦

和泰伯廟

故國城荒德未荒  
年年椒奠濕中堂  
邇來父子爭天下  
不信人間有讓王

和宿木蘭院



苦吟清漏迢迢極月過花西尚未眠猶憶故山歌  
警枕夜來嗚咽似流泉

和重題薔薇

穠華自古不得久況是倚春春已空更被夜來風  
雨惡滿階狼籍沒多紅

和春夕酒醒

幾年無事傍江湖醉倒黃公舊酒壚覺後不知明  
月上滿身花影倩人扶

和木蘭後池三詠

重臺蓮花

水國煙鄉足芰荷就中芳瑞比難過風情為與吳王近  
紅萼常教一倍多

浮萍

晚來風約半池明重疊侵沙綠罽成不用臨池更相笑  
最無根蒂是浮名

白蓮

素蘂多蒙別艷欺此花真合在瑤池  
還應有恨無人覺  
月曉風清欲墮時

和重題後池

曉煙清露暗相和浴鴈浮鷗意緒多  
却是陳王詞賦錯  
枉將心事託微波

和胥門閒泛

細槳輕撐下白蘋故城花謝綠陰新  
豈無今日逃名士  
試問南塘著屨人

襲美初植松桂偶題

軒陰冉冉移斜日寒韻泠泠入晚風  
煙格月姿曾不改至今猶似在山中

和館娃宮懷古五絕

三千雖束水犀珠半夜夫差國暗屠  
猶有八人皆二八獨教西子占亡吳

一宮花渚漾連漪佞墮鴉鬟出繭眉  
可料座中歌舞袖便將殘節拂降旗

幾多雲榭倚青冥  
越焰燒來一片平  
此地最應沾恨血  
至今春草不勻生

江色分明練遶臺  
戰帆遙隔綺疏開  
波神自厭荒淫主  
句踐樓船穩帖來

寶林香綦碎曉塵  
亂兵誰惜似花人  
伯勞應是精靈使  
猶向殘陽泣暮春

和虎丘寺西小溪閒泛三絕

樹號相思枝拂地  
鳥語提壺聲滿溪  
雲涯一里千萬曲

直是漁翁行也迷

荒柳卧波渾似困宿雲遮塢未全癡雲情柳意蕭蕭會  
若問諸餘摠不知

每逢孤嶼一倚檝便欲狂歌同採薇任是煙蘿中待月  
不妨歌枕扣舷歸

和天竺寺八月十五夜桂子

霜實常聞秋半夜天台天竺墮雲岑

垂拱中天台桂子  
落一百餘日方止

如何兩地無人種却是湘灘是桂林

戲題龔美書印囊

鵲銜龜顧妙無餘不愛封侯愛石渠  
應笑休文過萬卷至今誰道沈家書

和釣侶二章

一艇輕擗看曉濤接羅拋下漉春醪  
相逢便倚蒹葭泊更唱菱歌擘蟹螯

雨後沙虛古岸崩魚梁移入亂雲層  
歸時月墮汀洲暗認得妻兒結網燈

和寄同年韋校書

萬古風煙滿故都清才搜括妙無餘可中寄與芸香客  
便是江南地里書

和初冬偶作

桐下空堦疊綠錢貂裘初綻擁高眠小壚低幌還遮掩  
酒滴灰香似去年

和醉中寄一壺并一絕

酒痕衣上雜莓苔猶憶紅螺一兩盃正被遶離荒菊笑



日斜還有白衣來

和再韻

堦下飢禽啄嫩苔  
野人方倒病中盃  
寒蔬賣却還沽喫  
可有金貂換得來

和重玄寺雙矮檜

可憐煙刺是青螺  
如到雙林誤禮多  
更憶早秋登北固  
海門蒼翠出晴波

醉中戲贈龍美

南北風流舊不同  
僖吳今日若相通  
病來猶伴金盃滿  
欲得人呼小褚公

潤卿遺青餽飯

舊聞香積金仙食  
今見青精玉斧餐  
自笑鏡中無骨錄  
可能飛上紫雲端

文燕招潤卿博士辭以道侶將至一絕寄之

仙客何時下鶴翎  
方瞳如水腦華清  
不過傳達楊君夢  
從許人間小北聽

再招

遙知道侶談玄次  
又是文交麗事時  
雖是寒輕雲重日  
也留花簾待徐摘

齊梁怨別

寥寥缺月看將落  
簷外霜華染羅幕  
不知蘭棹到何山  
應倚相思樹邊泊

玩金鵝鵲戲贈龔美

曾向溪邊泊暮雲  
至今猶憶浪花羣  
不知鏤羽凝香霧

堪與鴛鴦覺後聞

閒居雜題五首

以題十五  
字離合

鳴蜩早

閒來倚杖柴門口  
鳥下深枝啄晚虫  
周步一池銷半日  
十年聽此鬢如蓬

野態真

君如有意耽田里  
予亦無機向藝能  
心跡所便唯是直  
人間聞道最先憎

松間斟

子山園靜憐幽木公幹詞清詠華門日上風微瀟灑甚  
斗醪何惜置盈樽

飲巖泉

已甘茅洞三君食欠買桐江一朵山巖子瀨高秋浪白  
水禽飛盡釣舟還

當軒鶴

自笑與人乖好尚田家山客共柴車干時未似接盧雀

烏道閒携相爾書

藥名離合夏日即事三首

乘履着來幽砌滑石甃煎得遠泉甘草堂祇待新秋景  
天色微涼酒半酣

避暑最須從朴野葛巾筠席更相當歸來又好乘涼釣  
藤蔓陰陰著雨香

窓外曉簾還自卷栢烟蘭露思晴空青箱有意終須續  
斷簡遺編一半通

金  
卷十一  
和懷錫山藥名離合二首

鶴伴前溪栽白杏  
人來陰洞寫枯松  
蘿深境靜日欲落  
石上未眠聞遠鐘

佳句成來誰不伏  
神丹偷去亦須防  
風前莫怪携詩藥  
本是吳吟蕩漿郎

和懷鹿門縣名離合二首

雲容覆枕無非白  
水色侵磯直是藍  
田種紫芝食可壽  
春來何事戀江南

竹溪深處猿同宿松閣秋來客共登  
封逕古苔侵石鹿城中誰解訪山僧

寄題天台國清寺齊梁體

峯帶樓臺天外立明河色近杲恩濕松間石上定僧寒  
半夜猶溪水聲急

和諫議訓先輩霜菊

紫莖芳艷照西風祇怕霜華掠斷叢  
爭奈病夫難強飲應須速自召車公



寒日古人名

初寒朗詠徘徊立欲謝玄關  
早晚開昨日登樓望江色  
魚梁鴻鴈幾多來

和皐橋

橫絕春流架斷虹  
凭欄猶思五噫風  
今來未必非梁孟  
却是無人繼伯通

和襲美悼鶴

鄧都香稻字重思  
遙想飛魂去未飢  
爭奈野鴉無數健

黃昏來占舊棲枝

和醉中寵美先起

莫唱艷歌凝翠黛已通仙籍在金閨  
他時若寄相思淚紅粉痕應伴紫泥

和酒病偶作

柳疎桐下晚牕明祇有微風為析醒  
唯欠白綃籠解散

解散王儉髻名時人皆慕之也

洛生閒詠兩三聲

憶白菊

稚子書傳白菊開西成相滯未容迴月明階下牕紗薄  
多少清香透入來

和同潤卿寒夜訪龍美各惜其志韻

醉運飄飄不可親掉頭吟側華陽巾如能跂脚南窓下  
便是羲皇世上人

和寒夜文醺潤卿有期不至

細雨輕觴玉漏終上清詞句落吟中松齋一夜懷貞白  
霜外空聞五粒風

移石盆

移得龍泓漱灩寒，月輪初下白雲端。  
無人盡日澄心坐，倒影新篁一兩竿。

石竹花詠

曾看南朝畫國娃，古羅衣上碎明霞。  
而今莫共金錢鬪，買却春風是此花。

南里集卷十一

謹案卷九第十頁前七行尉佗望漢所築刊本佗訛他據漢書改

卷十第三頁前六行早晚却還宗炳社刊本炳訛柄據全唐詩改

第五頁後五行盡望空碧禮文星刊本望空訛空望據全唐詩改

第七頁前六行萬壑烟霞秋後到刊本後訛浚據全唐詩改

卷十一第十二頁後四行齊梁怨別刊本齊訛徐

據全唐詩改



總校官庶吉士臣張能照

校對官編修臣楊壽楠

謄錄監生臣鄒貽詩

謄錄監生臣熊輝



欽定四庫全書薈要

集部

甫里集卷十二至  
四

詳校官助教臣常循



欽定四庫全書薈要卷一萬四千八十七

集部

甫里集卷十二

唐 陸龜蒙 撰

言絕句

和友人許惠酒以詩徵之

凍醪初漉嫩如春  
輕蟻漂漂雜藥塵  
得伴方平同一醉  
明朝應作蔡經身

圓載上人挾儒書歸日本國

九流三藏一時傾萬軸光凌渤海聲從此遺編東去後  
却應荒外有諸生

閒吟

閒吟料得三更盡始把孤燈背竹窓一夜西風高浪起  
不教歸夢過寒江

秘色越器

九秋風露越窯開奪得千峰翠色來好向中宵盛沆瀣  
共嵇中散鬪遺杯

景陽宮井

古堞烟埋宮井樹  
陳主吳姬墮泉處  
舜沒蒼梧萬里雲  
却不聞將二妃去

江南二首

便風船尾香杭熟  
細雨罾頭赤鯉跳  
待得江陰閒望足  
日斜方動木蘭橈

村邊紫豨花垂次  
岸上紅梨葉戰初  
莫怪煙中重回首  
酒家青紵一行書

溪思雨中

雨映前山萬絢絲  
擄聲衝破似鳴機  
無端織得愁成段  
堪作騷人酒病衣

江城夜泊

漏移寒箭丁丁急  
月掛虛弓靄靄明  
此夜離魂堪射斷  
更須江笛兩三聲

宮人斜

草著愁烟似不春  
晚鶯哀怨問行人  
須知一種埋香骨

猶勝昭君作虜塵

送綦客

滿目山川似勢綦  
況當秋鴈正斜飛  
金門若召羊玄保  
賭取江東太守歸

漢宮詞

招靈閣上霓旌絕  
柏梁臺中珠翠稠  
一身三十六宮夜  
露滴玉盤青桂秋

上清

玉林風露寂寥清  
仙妃對月閒吹笙  
新篴冷澀曲未盡  
細拂雲枝棲鳳驚

秋荷

蒲葦承露有佳色  
芰葉束煙如効顰  
盈盈一水不得渡  
冷翠遺香愁向人

有別二首

且將絲線繫蘭舟  
醉下烟汀減去愁  
江上有樓君莫上  
落花隨浪正東流

池上已看鶯舌默雲間應即鴈翰開  
唯愁別後當風立  
萬樹將秋入恨來

病中曉思

月墮霜西竹井寒  
轆轤絲凍下瓶難  
幽人病久渾成渴  
愁見龍書一鼎乾

送友之湖上

故人溪上有魚舟  
竿倚風蘋夜不收  
欲寄一函聊問訊  
洪喬寧作置書郵



寒日逢僧

瘦脰高寒梵牒輕  
野塘風勁錫環鳴  
如何不向深山裏  
坐擁閒雲過一生

冬柳

柳汀斜對野人牕  
零落衰條傍曉江  
正是霜風飄斷處  
寒鷗驚起一雙雙

寄友

敬亭寒夜溪聲裏  
同聽先生講太玄  
上得雲梯不回首

釣竿猶在五湖邊

島樹

波濤漱苦盤根淺風雨飄多着葉遲迴出孤煙殘照裏  
鷺鷥相對立高枝

頭陀僧

萬峰圍繞一峯深  
向此長脩苦行心  
自掃雪中歸鹿跡  
天明恐被獵人尋

晚渡

半波風雨半波晴  
漁曲飄秋野調清  
各樣蓮船逗村去  
笠簷簑袂有殘聲

贈老僧二首

枯貌自同霜裏木  
餘生唯指佛前燈  
少時寫得坐禪影  
今見問人何處僧

自有家山供衲線  
不離溪曲取庵茅  
舊曾聞說林中鳥  
定後長來頂上巢

憶山泉

一夜寒聲來夢裏  
平明着屐到聲邊  
心期盛夏同過此  
脫却荷衣石上眠

白芙蓉

澹然相對却成勞  
月染風裁箇箇高  
似說玉皇親謫墮  
至今猶着水霜袍

嚴光釣臺

片帆竿外揖清風  
石立雲孤萬古中  
不是狂奴為故態  
仲華爭得黑頭公

讀陳拾遺集

蓬顆何時與恨平  
蜀江衣帶蜀山輕  
尋聞騎士梟黃祖  
自是無人祭禰衡

吳宮懷古

香逕長洲盡棘叢  
奢雲艷雨祇悲風  
吳王事事須亡國  
未必西施勝六宮

送琴客之建康

蕙風杉露共泠泠  
三峽寒泉漱玉清  
君到南朝訪遺事

柳家雙鎖舊知名

閨怨

白袷行人又遠遊  
日斜空上映花樓  
愁絲墮絮相逢著  
絆惹春風卒未休

丁香

江上悠悠人不問  
十年雲外醉中身  
殷勤解却丁香結  
縱放繁枝散誕春

種蒲

杜若溪邊手自移，旋抽煙劍碧參差。  
何時織得孤帆去，懸向秋風訪所思。

范蠡

平吳專越禍胎深，豈是功成有去心。  
句踐不知嫌鳥喙，歸來猶自鑄良金。

山僧二首

山蘚幾重生草履，澗泉長自滿銅鉚。  
時將如意敲眠虎，遣向林間坐聽經。

一夏不離蒼島上秋來頻話石城南思歸瀑布聲前坐  
却把松枝拂舊庵

上雲樂

青絲作笮桂為船白兔擣藥蝦蟇丸便浮天漢泊星渚  
回首笑君承露盤

眠

一簾臨窻薤葉秋小簾風蕩半離鉤魂清雨急夢難到  
身在五湖波上頭



行

尋人直到月塢北  
覓鶴便過雲峯西  
只今猶有疎野調  
但繞莓苔風雨畦

倚

橘下凝情香染巾  
竹邊留思露搖身  
背煙垂首盡日立  
憶得山中無事人

吟

憶山搖膝石上晚懷古  
掉頭溪畔涼有時得句一聲發

驚起鷺鷥和夕陽

食

日午空齋帶睡痕  
水蔬山藥薦盤飧  
林鳥信我無機事  
長到而今下石盆

坐

偶避蟬聲來隙地  
忽隨鴻影入遼天  
閒僧不會寂寥意  
道學西方人坐禪

新沙

渤海聲中漲小隄官家知後海鷗知蓬萊有路教人到  
應亦年年祝紫芝

鄴宮詞二首

魏武平生不好香楓膠蕙炷潔宮房可知遺令非前事  
却有餘薰在繡囊

花飛蝶駭不愁人水殿雲廊別置春曉日靚粧千騎女  
白櫻桃下紫綸巾

古別離

仙人左手把長箭欲射日烏烏不棲何事離情畏明發  
一心唯恨汝南雞

高道士

峨眉道士風骨峻手把玉皇書一通東遊借得琴高鯉  
騎入蓬萊清淺中

蔬食

孔融不要留殘膾庾悅無端恡子搗香稻熟來秋菜嫩  
伴僧殮了聽雲和

寄遠

縹梨花謝鶯口喫黃犢少年牛未歸畫扇紅絃相揜映  
獨看斜月下簾衣

山中僧

手闌一室翠微裏日暮白雲棲半間白雲朝出天際去  
若比老僧猶未閒

洞宮秋

濃霜打葉落地聲南溪石泉細泠泠洞宮寂寞人不寐

坐見月生雲母屏

連昌宮詞二首

門

金鋪零落獸鐸空斜  
揜雙扉細草中日暮  
鳥歸宮樹綠  
不聞鴉軋閉春風

階

草沒苔封疊翠斜  
墜紅千葉擁殘霞  
年年直為秋霖苦  
滴陷青珉隱起花

懷宛陵舊遊

陵陽佳地昔年遊  
謝朓青山李白樓  
唯有日斜溪上思  
酒旗風影落春流

松石曉景圖

霜骨雲根慘澹愁  
宿烟封着未全收  
將歸與說文通後  
寫得松江岸上秋

釣車

小輪輕線妙無雙  
曾伴幽人酒一缸  
洛客見時如有問

輶煙衝雨過桐江

漉酒巾

靖節高風不可攀  
此巾猶墜凍醪間  
偏宜雪夜山中戴  
認取時情與醉顏

華陽巾

蓮花峯下得佳名  
雲褐相兼上鶴翎  
須是古壇秋霽後  
靜焚香炷禮寒星

方響



擊霜寒玉亂丁丁花底秋風拂坐生  
王母閒看漢天子  
蒲猗蘭殿珮環聲

白鷺

雪然飛下立蒼苔應伴江鷗拒我來  
見欲扁舟搖蕩去  
倩君先作水雲媒

溪行

晚天寒雨上灘時他已揚舠我尚遲  
自是檣低帆幅少  
溪風終不兩般吹

太湖叟

細槩輕船買石歸  
酒痕狼籍徧苔衣  
攻車戰艦繁如織  
不肯回頭問是非

答友

荆卿雄骨化為塵  
燕市應無共飲人  
能脫鷗鷺來換酒  
五湖賒與一年春

偶作

酒信巧為繚病緒  
花音長作嫁愁媒  
也知愁病堪回避

爭奈流鶯喚起來

春思二首

竹外麥烟愁漠漠  
短翅啼禽飛魄魄  
此時憶着千里人  
獨坐支頤看花落

江南酒熟清明天  
高高綠旆當風懸  
誰家無事少年子  
滿面落花猶醉眠

訪僧不遇

棹倚東林欲問禪  
遠公飛錫未應還  
蒙莊弟子相看笑

何事空門亦有闕

謝山泉

決決春泉出洞霞  
石壇封寄野人家  
草堂盡日留僧坐  
自向前溪摘茗芽

洞宮夕

月午山空桂花落  
華陽道士雲衣薄  
石壇香散步虛聲  
杉雲清冷滴栖鶴

峽客行

萬仞峯排千劒束孤舟夜繫峯頭宿蠻溪雪壞蜀江傾  
艷潏朝來大如屋

江邊

江邊日晚潮煙上樹裏鴉鴉枯棹響無因得似灌園翁  
十畝春蔬一藜杖

簾

枕映疎容晚向歌秋煙脉脉雨微微逆風障燕尋常事  
不學人前當妓衣

開元雜題七首

玉龍子

何代奇工碾玉英  
細髯纖角盡雕成  
煙乾霧悄君心苦  
風雨長隨一擲聲

照夜白

雪蚪輕駿步如飛  
一練騰光透月旗  
應笑穆王拋萬乘  
踏風鞭露向瑤池

舞馬

月窟龍孫四百蹄  
驕驪輕步應金鞵  
曲終似要君王寵  
回望紅樓不敢嘶

雜伎

拜象馴犀角觝豪  
星丸霜劍出花高  
六宮爭近乘輿望  
珠翠三千擁赭袍

雪衣女

嫩紅鈎曲雪花攢  
月殿棲時片影殘  
自說夜來春夢惡  
學持金偈玉欄干

繡嶺宮

繡嶺花殘翠倚空  
碧牕瑤砌舊行宮  
閒乘小馬濃陰下  
時舉金鞭半袖風

湯泉

暖殿流湯數十間  
玉渠香細浪回環  
上皇初解雲衣浴  
珠棹時敲瑟瑟山

荆溪早景題杜秀才水亭

曉和風露立晴煙  
祗恐腥魂浣洞天  
雲肆有龍君若買



便敲初日鑄金錢

翠碧

紅襟翠翰兩參差  
徑拂煙華上細枝  
春水漸生魚易得  
莫辭風雨坐多時

甫里集卷十二